



«Diever da la lingua e cumpetenzza linguistica tar RTR»

■ (cp) Il Cussegl dal public SRG.R è sa fatschentà en sia ultima seduta cun l'applicaziun da la «Directiva per il diever dals linguatgs» tar RTR Radiotelevisiun Svizra Rumantscha. La cumpetenzza linguistica è vegnida giuditgada da trais gruppas da lavur. Medemamain è vegnids discutads ils rapports davart las elecziuns 2014 en il chantun Grischun. Il Cussegl dal public SRG.R atesta a RTR in diever dal linguatg che vegn applitgà adequat a l'adressat. Il focus principal è en spezial sin la chapibilità tranter ils idioms. La percepziun d'in auter idiom che l'agen chaschuna dentant savens difficultads, uschia che la mancanza da cumpetenzza linguistica vegn magari crititgada senza in veritabel motiv. La cumpetenzza linguistica tar RTR è en general buna. Tuttina ston la scolaziun e cultivaziun da la lingua vegnir tgradas er en l'avegnir. Il cussegl constatescha che la qualitat dal linguatg en il Radio Rumantsch è pli flailva che en la Televisiun Rumantscha. Quai ha era da far cun il fatg che discurs e furmas d'emissions spontanias èn pli derasadas al radio. Il diever dal rumantsch grischun persvada.

Anna-Alice Dazzi lavura dapi quatter mais sco linguista tar RTR. Ella ha orientà ils commembers dal Cussegl

dal public SRG.R da sia lavur, infurmà da las sfidas principalas da quella e discutà cun ils preschents davart il diever dals linguatgs en general tar RTR. La lavur quotidiana d'Anna-Alice Dazzi consista en l'accumpagnament dals schurnalists. Propostas per optimar il diever da la lingua succedan per regla immediat.

Persvadi han ils rapports da RTR en connex cun las elecziuns 2014 en il chantun Grischun. La preschentaziun dals candidats per la regenza en la seria «Candi-Cartoon» è fitg gartegiada. Ils purtrets animads èn spiertus ed il medem mument infurmativ. RTR rapporta en moda e maniera detagliada da las elecziuns 2014, ed il dossier sin rtr.ch persvada cun ina gronda varietad d'infurmaziun.

En la seduta dal settember 2014 – che ha lieu extra muros a Casti ed a Savognin – sa fatschenta il cussegl cun l'infurmaziun da RTR ord la chasa federala a Berna. Era sa participescha ina gruppas da lavur a l'observaziun dal campinadi mundial da ballape. Quella vegn fatga il medem mument da tut ils cussegls dal public da las uniuns purtadras da la SRG ssR. L'attenziun speziala dal cussegl è sin l'offerta da RTR che vegn silsuenter cumparegliada cun quella en las autras regiuns linguisticas da la Svizra.